

摘藻堂四庫全書薈要

集部

欽定四庫全書薈要

集部

中州集卷九



詳校官候選知縣臣吳甸華

欽定四庫全書薈要卷二萬八十二集部

中州集卷九

壬集

金元好問輯

先生賁一首

賁汴人自號決壽老自上世以來至其孫淵俱
以經學顯

客有求觀予孝經傳者感而賦詩

古人文瑩理後人但工文文工理愈暗紙札何紛紛君

看六藝學天葩吐竒芬詩書分體製禮樂造乾坤千岐
更萬轍要以一理存如何臻至理當從踐履論跋涉經
險阻鑽研閱寒溫孝弟作選鋒道德嚴中軍仰觀及俯
察萬象入見聞不勞施斧鑿筆下生烟雲高以君唐虞
下以覺斯民君如不我鄙時來對爐薰

王內翰樞

一首

樞字子慎良鄉人遼日登科仕國朝直史館

三河道中

十載歸來對故山
山光依舊白雲閒
不須更讀元通偈
始信人間是夢間

睡軒先生趙晦一首

晦字光道管城人
宋末代州法曹秀容主簿汴
京破後不復仕
自號睡軒居士
子洵子都大定
二十年進士
真定路總管判官孫綱
三赴廷試
以蔭補官
終于永壽
令曾孫居禮之讓
今在燕

中

莫春

豎枝梅子半青黃
葉底殘紅雨褪香
翠鈿舞風榆落莢
綠鍼浮水稻抽秧
酒濃猶覺春醒困
睡美方便午夢長
苦被啼鶯訴花老
揮毫聊作送春忙

浚水王先生世賞

四首

世賞字彥功汴人與尹無忌王逸賓趙文孺相
周旋明昌中保舉才能德行賜出身釋褐鞏州
教授終于鹿邑簿有浚水老人集傳于世

立春後十日登樓

今日登樓眼風煙倍覺新
溪梅初破萼屋雪半融銀
雁外天逾碧鷗邊水自春
兒曹應見笑吟望獨傷神

春雪

只謂春天暖寧知雪霰飛
龍蛇且深蟄花柳不勝威
糝糝凌風細紛紛帶雨稀
誰當問穹昊生殺果何機

探梅

候得南枝破玉腮
心顏今日為君開
細看苔徑無行跡

先賞應輸我獨來

稱善齋

宦途馳逐只堪羞
何意須封萬戶侯
平日少游真可念
絕勝辛苦駐壺頭

南湖靖先生天民一首

天民字達卿滄陽人其父國初官原武因而家焉
少日嘗兩魁鄉試自望者不碌碌所與交如龐才卿楊茂才劉之昂王逸賓皆一時名士晚

年買田南湖葺亭圃植竹樹以詩酒為事自號
南湖老人年七十九卒子文煒德昭從孫顥子
昂

西子放瓢圖

髻鬟蕭颯學蘿秋千古香溪水自流吳越兵爭竟何得
風流輸與五湖舟

東臯桑先生之維一首

之維字之才恩州人蔡丞相伯堅之子壻也以

樂府著稱有東臯集傳於世

白髮

白髮近年見十中三兩莖半因愁憤出多為病添成梳
裏有時落鑷餘還又生老知無可避何處是功名

步元舉一首

元舉關中人

下第過榆次

栖遲零落未歸人已坐無成更坐貧意氣敢論題柱客

晨昏多負倚門親，囊空漸覺錢餘貫。
衣敝翻饒蝨滿身，遙望秦關獨惆悵。
一天風雨落花春。

馮文叔一首

文叔遼東人

客舍

禿襟袖褐破書囊，十五年來客異鄉。
生事甯中搖虎尾，窮途天上轉羊腸。
三朝不過馮唐老，半夜悲歌甯戚狂。
獨倚牛車望遼海，西風塵土鬢蒼蒼。

張庭玉一首

庭玉字子榮易縣人能日賦百篇有集行于世

即事

烏鳶繞樹山梨熟蝴蝶穿花木槿開赤脚城中借書去
蒼頭原上負薪來

宗道一首

道字雲叟山陰人以足疾不仕有詩云家藏千
卷富身得一生閒茅屋經年補柴門盡日關其

自處可見

寶崑僧舍

寂寂鐘魚柏滿軒
午風輕颺煮茶煙
西堂竟日無人到
只許山人借榻眠

鮮于溥三首

溥字彥仁宋文臣子駿之後高祖溥溥之子孝
標標之子壽吉壽吉之子坦皆擢進士第而仕
亦達彥仁坦之子以門資仕終于櫟陽令濟源

盤谷天壤佳處坦父子居其間飲酒賦詩脩然
塵垢之外至今人以高士目之弟彥魯子忠厚
今居鄉里

魯村道中

小橋沙路已堪圖更著衰翁跨蹇驢莫靄似催寒日短
秋容仍帶遠林疎雕盤平野黃榆落兔走橫岡白草枯
漸喜閒身遠朝市一年強半在村墟

春日倣舊詩體

年老逢春莫等閒，逢春能得幾回看。
插花儘要花枝滿，把酒休辭酒盞乾。
好向酒邊留舞袖，不妨花外駐吟鞍。
閒身健在須行樂，燕語鶯啼春又殘。

早發

燈前夢斷家千里，馬上詩成月一痕。
晨粥未烹官路遠，隔林煙火是漁村。

史士舉二首

士舉字仲升，滎澤人。漢功臣弘肇之後。高祖所

賜鐵券故在其大父官濟源樂其山水因家焉
父神山令激石砮膺進士仲升以蔭補官歷銅
鞮三川兩縣令初任京兆錄事以歲旱擅開倉
賑貧身往太一湫禱雨尋獲嘉澍用是得名為
人雅重知義理褒衣緩帶消搖山水間宛然一
老書生也貞祐之亂避于太行保聚失守老幼
皆出降仲升義不受辱投絕澗而死年七十九
孫庭玉字德秀今居山陽

趙化

石根寒溜迸珠璣
尋丈驚看雪浪飛
我是玉川煙水客
甞來盤礴亦忘歸

晉祠

小橋流水竹蕭森
竹裏人家一徑深
只欠東風小籬落
梅花疎淡月籠陰

王敏夫二首

敏夫五臺人作詩工於賦物甚為趙宜之所稱

雁門前輩中有許蛻子遷以武皇廟詩著名又
酒渴後四句云眼底恨無雲夢澤胸中疑有沃
焦山南窗花影三竿日指點銀瓶照病顏有集
傳河東往往稱此倪民望字具瞻屏山所謂倪
侯頭如筆其鋒不可當者有種松詩云種松莫
種柳種柳莫種松堅脆非所計雅俗寧與同可
是種松無隙地却教憔悴柳陰中張韶九成寄
朔州苟輔臣云陳雷膠漆輕餘子楚漢風雲屬

少年李忠直卿賦雪云不將柳絮春風比好作
梨花月夜看至于蘓吉莘老李鵬翼冲霄與具
瞻之子仲儀詩文多可傳喪亂之後惜不能記
憶之矣

同東嵒元先生論詩

林逋仙去幾年來年驚見梅花第二篇千歲冰霜松骨瘦
九秋風露鶴聲圓騰輝定出連城上得趣知從太古前
邂逅茅齋話終夕只疑人世改桑田

李氏友雲樓

霧幕烟迷十二欄
壺觴招我一躋攀
黃簾卷起湘川竹
分得西州數點山

王利賓一首

利賓字茂實襄城人
朴直純素作詩有古意
似其為人然亦未嘗以
示人也家與衛昌叔隣
居而不相往來計平生
所交惟不肖而已予一
日過襄城知茂實病就
卧內候之乃見壁間所
黏

五言古詩十數首竄改重疊往往可傳然後知
茂實所以交予者特以詩故耳渠既不言予亦
無從知之惜登時不謄寫今忘之矣

題扇頭

輕紗畫竹雀柄短不盈握暑氣正憑陵清風一何邈

孫益 一首

益字德裕秀容人嘗從先大夫學詩

送張安中還雲中

名保極雲
朔名士

相送還相送臨分手重分驂
驢欣得路鴻雁惜離群木
落黃華露城低紫塞雲中秋月正好千里謾思君

郝先生天挺一首

天挺字晉卿陵川人家世儒素伯父子颺有詩
名號東軒老人先生少日有賦聲早衰多疾厭
於名場遂不復就舉貞祐之兵避于河南往來
淇衛間為人有崖岸耿耿自信寧落薄而死終
不一傍富兒之門年五十七卒於舞陽臨終浩

歌自得不以死生為意其平日自處為可見矣
好問十四五先人令陵川時從先生學舉業先
生教之曰今人賦學以速售為功六經百氏分
磔綴緝外或篇題句讀之不知幸而得之不免
為庸人況一敗塗地者乎又曰讀書不為藝文
選官不為利養唯通人能之又曰今世仕宦多
用貪墨敗官皆苦於飢凍不能自堅者耳男子
生世不耐飢寒則雖小事不能成子試以吾言

求之先生工於詩時命好問屬和或言令之子
欲就科舉詩非所急將無徒費日力耶先生曰
君自不知所以教之作詩正欲渠不為舉子耳
子思溫字和之孫經字伯常今居順天

送門生赴省闈

青出於藍青愈青小年場屋便馳聲未饒徐淑早求舉
却笑陸機遲得名嗟我再衰空眊矚喜君初筮已崢嶸
此行占取鰲頭穩平地烟霄屬後生

孫邦傑一首

邦傑字伯英雄州容城人曾祖堅國初有功官
至隴州刺史伯英少日住太學有時名所與游
皆名士興定初知世將亂棄家為黃冠師

燒筍

煨茁舊聞山谷語勸畊還憶大蘇詩傳將火候無多訣
留得天真又一竒未放錦裯開束縛已看玉版證茶毘
白麻初拜驚燒尾見此應慙富貴癡

張璪一首

璪字君玉大名朝城人嗜作詩年已老而刻苦
殊未減為人謹愿有禮見稱諸公間卒年六十
八子鏞鎮今居鄉里

送侯道士

十年走南北黃塵汙人衣翩翩夜啼烏一枝無可依問
君何所如鳧鳥東南飛恨我不得往失脚竄與機從君
知不能一笑人間非何水無蒲魚何山無蕨薇終當拂

衣去往叩雲山扉

徐好問 一首

好問字裕之永寧人

龍門

疏鑿而來道路通行人萬古翠微中南山山寺題詩滿
一字何嘗到禹功

呂大鵬 一首

大鵬字鵬舉密縣人自言宋名相申公之裔宣

宗頻歲南伐鵬舉作詩欲以撼主兵者云縫掖
無由挂劍衣劍花生澀馬空肥燈前草就平南
策一夜江神泣涕歸其以氣岸自許皆此類也

夏日

北渡
後作

旋移石枕拂藤床
細洒槐陰趁晚涼
大地嗷嗷困爐鼎
老天不肯下殘陽

高永一首

永字信卿出于盤陽大族父元字善長教信卿

作舉子讀書畧通即棄之去為人不顧細謹有

幽并豪俠之風賓客入門則盡家所有者為具

不為明日計人以此愛之貞祐初避兵太原與

李長源居于廣平寺有盜穴墻而入長源性惟

怯聞騷窅聲噤不敢語盜盡挈信卿所有而去

長源徐曰綠林之子至矣於是信卿生理大狼

狽南渡居嵩州出入屏山之門其學遂進初名

夔字舜卿又名揆屏山改焉真定王之奇士衡

攻雜學屏山目為怪魁王從之內翰為賦善哭
詩奉聖馬餌升公敢為大言著書十萬言號北
新子大畧以談兵為主且曰古人兵法非不盡
但未有北新子五十里火雨耳信鄉皆與之游
故其詩豪宕譎怪不為法度所窘有冰柱雪車
風調觀咀龍篇及大雨後見寄可槩見矣正大
壬辰病没于京師年四十六

跋賈天升所藏段志寧山水

蒼壁雲氣湧長松風雨寒湍流劈山出玉虹飲溪灣胸
中無雲夢筆底無江山想見破墨初布袖蛟龍蟠壯觀
駭魂魄萬象本自閒寒齋靜相對遠意空追攀

曹用之一首

用之歸德人幼有賦聲屢中甲乙詩亦有功嘗
戲作鬼仙語云瀏瀏竹間雨熒熒窗下燈相逢
不相顧含淚過巴陵詩有本事中山楊正卿能
道所以然真人作鬼語也

憶舊

花鳥巡簷喚曉晴
喚來和氣滿春城
春風二十年前客
煮酒青梅也後生

趙達夫二首

達夫太原人性嗜讀書而不事科舉南渡後居
緱氏山中安貧守分故終世窮悴壬辰之兵遇
害

紅梅

西湖句好已成塵蠟點都能幾許春乞與瓊兒薄梳洗
才情留待月中人

柳

楊柳攬春不耐秋十分憔悴儘風流水邊沙際風烟冷
收拾殘陽合暮愁

邢安國 二首

安國字仲祥沁州武鄉人少日有賦聲四十歲
後即不應科舉以詩酒自娛避亂客泌陽十餘

年後北歸備極艱苦其見於詩者如此往時李
長源傳仲祥柳花一詩渠甚愛之今以丹崖集
校之與傳者不同當是長源曾與商畧之耶

楊花

細點輕團轉復飄隋家堤岸霸陵橋非綿非絮寒無用
如雪如霜暖不消狂惹客衣知有恨巧尋禪榻故相撩
陂塘回首浮萍滿依舊春風擺翠條

過唐州西李口

白沙翠竹溪上村
漁家賣魚喚行人
西風吹皺一溪水
水光日影金鱗鱗

張溫一首

溫字元佐上黨人
祖仲容字才翁
宋末登科仕
至屯田員外郎
以好士名天下
致仕後有詩云
病身衰退謝明朝
北洞閒眠晝寂寥
十畝晚禾
煙冉冉一林脩
竹雨瀟瀟
黑花遮眼秋不落
白雪撲頭春未消
世事悠悠吾老矣
一壺濁酒且

逍遙至今為鄉里所傳元佐泰和六年李演膺
乙科登第詩樂府俱有名于時

感懷一首

彌月不出門出門沙漲東風昏老樹擺撼轟雷奔鬼物
叫嘯山前村僑居客子驚心魂歸來繞屋尋蘭孫蘭孫
落索靈苗髡主人醉倒老瓦盆衣袖半帶淋漓痕芸芸
蕭艾同歸根天生天殺何怨恩糟床與翁共清渾絕勝
被髮叫帝閣

馬舜卿一首

舜卿名肩龍以字行宛平人先世遼大族有知
興中府者故又號興中馬氏祖大中國初登科
節度全錦兩州父成誼字宜之張楫膺登科京
兆路統軍司判官舜卿在太學有賦聲宣宗初
人有告宗室從坦殺人從坦字履道一時賢將
帥處猜嫌之地人以為必死而不敢言其冤舜
卿以太學生上書大畧謂從坦有將帥材方今

人物無有出其右者臣一介書生無用於世願
代從坦死留為天子將兵書奏詔問汝與從坦
交分厚耶舜卿對臣知有從坦從坦未嘗識臣
從坦寃人不敢言臣以死保之宣宗感悟赦從
坦授舜卿東平錄事委行臺試驗宰相侯莘公
與之語不契留數月罷歸將渡河與排岸官紛
競篋中搜得軍馬糧料名數及利害事目疑其
姦人之偵伺者繫歸德獄根勘適從坦至立命

出之正大四年冬薄游鳳翔德順州將愛申以
書招舜卿舜卿欲往鳳翔總管以敵兵勢甚張
吾城可恃德順不可守勸勿往舜卿曰愛申平
生未嘗識我一見為知己我知德順不可守我
往必死然以知己故不得不死也乃舉行橐付
族父明之為死別冒險而去既至不數日受圍
城中義兵七八千而已州將假舜卿鳳翔總管
判官守禦一以委之凡受攻百日食盡乃陷軍

中募生致之不知所終時年五十三詔贈某官
配食褒中廟舜卿年少時過襄垣題詩酒家壁
辭氣縱橫時輩少有及者如云玉鞭再過長安
道人面依然似花好殷勤勸我梨花春要看尊
前玉山倒他語類此

會州道中

山腰薄雪眩朝曦未放陽和入燒痕一片長安世情月
梨花院落幾黃昏

諸相

劉曹王豫七首

豫字彥由阜城人仕宋知濟南府事汴京下立
張邦昌為大楚皇帝宋滅楚更立彥由國號齊
建元阜昌八年廢為蜀王遷黃龍府改封曹有
集十卷行于世二子麟猊孫通海陵潮叅知政
事四世孫瑛今在太原

雜詩六首

竹塢人家瀕小溪數枝紅杏出疎籬門前山色帶烟重
幽鳥一聲春日遲

又

風荷柄柄弄清香輕薄沙禽落又翔紅日轉西漁艇散
一川山影莫天涼

又

古渡停驂日向沈淒涼歸思梗清吟碧山幾點塞天濶
紅葉一林秋意深

又

倚嵒蕭寺據危崖
丈室軒窗面水開
雪霽莫寒山月上
數竿脩竹一枝梅

又

書色清明著色圖
山光凝翠接平湖
煙嵐自古人難畫
遠即深深近却無

又

寒林煙重暝棲鴉
遠寺疎鐘送落霞
無限嶺雲遮不斷

數聲和月到山家

客館

雪消北嶺安排暖
寒入東風阻節春
絕塞亂山圍古驛
他時說着也愁人

杜丞相充一首

充字公美相州人仕宋知滄州歸國拜尚書右
丞相領中山行臺以壽終

塵

汨汨勞生為爾忙，只除不到白雲鄉。
步回洛浦生羅襪，歌斷秦樓較杏梁。
閒撲衣襟迷遠望，靜穿窗隙鎖斜陽。
帝城別有風流在，輦路春風十里香。

虞令公仲文一首

仲文字質夫，世南之裔，武州寧遠人，仕為遼相。
歸朝授樞密使、平章政事，封秦國公。四歲作詩。
賦煎餅有魚目蟬聲之句，人以神童目之。

雪花四歲作

瓊英與玉蘂片片落前池問著花來處東君也不知

張丞相孝純一首

孝純字永錫滕陽人宣和末知太原國兵圍守
踰年人相食幾盡乃下朝廷怜其忠換相職後
以相齊致仕汴京建行臺起為左丞相踰年得
請歸鄉里二兄尚安健鄉人為作三老圖薨謚
安簡子公藥字元石昌武軍節度副使致仕孫
觀字彥國世為文章家曾孫厚之字茂弘承安

二年進士

中運使寄酒清明日到以詩謝之

芳樽到日恰清明似與佳辰默計程
擬助林園延勝賞肯容桃李落繁英
老來官爵渾無味閒裏杯盤却有情
見說使車臨岱麓儻能相過共飛觥

張左相汝霖一首

汝霖字仲澤遼陽人家世貴顯父浩字浩然以
門資仕揚歷中外遂升端揆進拜太師封南陽

郡王五子仲澤平章政事莘國公汝為字仲宣
河北東路轉運使汝翼仕不達皆進士也汝方
字仲賢自號丹華老人汝猷字仲謀俱至宣徽
使父子兄弟各有詩傳於世王子端內翰太師
之外孫其淵源有自云

春溪一首

黯黯春愁底處消
小桃無語半含嬌
東風不管前溪水
暖綠溶溶拍畫橋

劉右相長言一首

長言字宣叔東平人宋相莘老之孫而學易先生斯立之猶子也父蹟年三十五終於儀真令工詩能文有南榮集傳東州今獨余家有之宣叔正隆宰相詩文能世其家今不復見矣

通叔以詩送古鏡為長言生日之壽次韻謝之

綵衣綠隱非臞仙猶有向來文字緣都城一別兩歲晚寄聲勞苦常相先人間始生俗禮重而我永感方頽然

遠憑詩句致竒物欲挽莫景迴虞淵規摹九寸函大方
古製不作菱花妍開奩拂拭愧陋質但喜虹氣浮晴天
夫君久要心不遷期與鐵杖論清堅保身賴此孤月圓
明年上印歸行田

右相文獻公耶律履一首

履字履道東丹王之七世孫學易通太玄至於
陰陽歷數無不精究嘗以鄉賦一試有司以露
索為耻遂不就舉蔭補國史掾興陵朝累遷薊

州刺史入翰林為脩撰歷直學士待制禮部尚
書特賜孟宗獻胸進士第俄預淄王定冊功拜
叅知政事明昌元年進右丞薨年六十一興陵
嘗問宋名臣孰為優履道以蘇端明軾對上曰
吾聞軾與王誥交甚款至作歌曲戲及姬侍非
禮之甚尚何足道耶履道進曰小說傳聞未必
可信就使有之戲笑之間亦何得深責世徒知
軾之詩文人不可及臣觀其論天下事實經濟

之良才求之古人陸贄而下未見其比陛下無
信小說傳聞而忽賢臣之言明日錄軾奏議上
之詔國子監刊行自號忘言居士有集傳於世
三子辨才武廟署令善才工部尚書楚才中書
令四孫鈞鉉鏞鑄

史院從事日感懷

不學知章乞鑑湖不隨老阮醉黃墟試從麟閣諸賢問
肯屑蘭臺小史無一戰得侯輸妄尉長身奉粟愧侏儒

禁城鐘定燈花落坐拊塵編惜壯圖

張平章萬公一首

萬公字良輔東阿人正隆二年進士仕長山令
有惠政人為立祠入為右司員外郎太師淄王
愛之許以宰相器明昌初累遷御史中丞以言
事忤旨除彰國軍節度使召為大興尹拜叅知
政事以母老丐歸養出判東平河中濟南丁內
艱起復擢平章政事封壽國公為相知大體有

敦龐耆艾之目既致政而眷顧未衰復起判濟
南安撫山東便宜行事未幾得請薨於家謚文
貞繪像行慶宮配享章宗廟廷

戊戌二月中旬登稷山清榭

問囚推案朝還莫危坐不知春淺深今日檐間看風色
一株紅杏暗驚心

董右丞師中一首

師中字紹祖邯鄲人後徙汝州皇統九年進士

承安中入政府直道自立而以通材濟之泰和
初元妃李氏方寵幸兄喜兒為宣徽使有揚國
忠之權一日德州教授田庭方上書言事云大
臣持祿近臣怙寵此言路之所以塞也道陵顧
謂紹祖言大臣持祿當謂公等近臣怙寵者為
誰時喜兒侍立殿上紹祖倒笏指之曰莫非謂
李喜兒之屬否上頷之紹祖嘗言作宰相不難
但一心正兩眼明足矣少日以談諧得名及在

相位亦未嘗廢談笑然不害其為國朝名相也
俄致政賜第京師後三年薨有燕賜邊部詩傳
於世紹祖師王內翰彥潛而與之同榜登科彥
潛沒後待其子恩禮殷重不減骨肉論者謂孫
鐸振之事其兄明之張毅伯英愛其弟伯玉舉
世無與為比至於紹祖之待其師之子則古所
未有也有漳州集傳于家

自臨洮還

臨潭仍是漢家城

漢家城在臨潭羌人所稱

積石相望十驛程西畧

河源東並海此身何地不經行

紹祖之孫濟剛記此詩末句又作塵埃風雨歎

生勞

孫太師鐸一首

鐸字振之恩州人太定十三年進士明昌中擢

戶部尚書時已有相望及考滿以戶曹繁重且

未有可代者特旨進一官再任而同列二人俱

以入相矣振之賀席中戲舉青州老柏院布衣

張在詩云南隣北里牡丹開公子王孫去不回
惟有廷前老柏樹春風來似不曾來為御史所
劾降授同知河南府事有以詩送之者云想到
洛陽春正好南隣北里牡丹開聞者皆大笑振
之後入政府遷尚書右丞薨贈太子太師作詩
甚多其賦玉簪有披拂秋風如有待襄回涼月
更多情之句甚為詩家所稱

癸亥清明日

脩然一室暗塵凝兀兀端如打坐僧習氣未除私自笑
短檠還對讀書燈

梁叅政瑄一首

瑄字國寶別字瑩中范陽人大定十六年進士
歷州縣稍遷警言巡使治尚嚴肅權貴斂迹朝廷
知其才累試繁劇由中都路轉運使拜戶部尚
書俄叅知政事資方正敢言大事北兵動立和
議人有笑其懦者卒如其言未幾薨於位虎賁

卷九
咤曰梁瑾在族矣其為人可知

留題長平驛

秦趙均為失霸圖起何殘忍括何愚殺降未見無禍者
累將其能有種乎日莫悲風噎丹水夜深寒月照頭顱
山名也快心千載杜郵劍人所誅耶鬼所誅

賈左丞益謙一首

益謙字亨甫本名守謙避哀宗諱改焉宣宗朝
叅知政事出知濟南移鎮河中南渡後召拜左

丞尋致仕居鄭州哀宗即位史官乞因宣廟實

錄遂及衛紹王初虎賊既弒逆乃立宣宗宣宗

之人至謂衛王失道天命絕之虎實無罪且於

主上有推戴之功獨張信甫上章言虎賊大逆

不道當用宋文帝誅傅亮徐羨之故事章奏不

報爾後舉朝以大安崇慶之事為諱及是謂亨

甫大安中嘗拜御史中丞宜知衛王事乃差編

脩官一人就訪之亨甫知其旨謂來者言知衛

王莫如我然我聞海陵被弑而世宗皇帝立大
定三十年禁近能暴海陵蟄惡者得美仕史官
脩實錄誣其淫毒狠鷙遺臭無窮自今觀之百
可一信耶衛王勤儉慎惜名器較其行事中材
不能及者多矣吾知此而已設欲飾吾言以實
吾罪吾亦何惜餘年朝議偉之正大三年年八
十薨子賢卿頤卿翔卿皆以門資仕今一孫仲
明在東平

贈答史院從事

見說才名自妙年，多慙政府舊妨賢。
物華天寶無今古，鳳閣鸞臺孰後先。
鄭圃道尊何敢望，濟南書在子當傳。
莫言老眼昏花滿，及見風鵬上九天。

丞相壽國高公汝礪一首

汝礪字崑甫，應州金城人。大定中進士，揚歷中外，居戶曹三司，為最久。相宣宗十年，小心畏慎，夙夜匪懈，篤于古人造膝詭辭之義，謀謨周密。

人莫得而聞元光末宣宗上仙公亦薨於位君
臣之契義均同體者於斯見之平生嗜讀書南
渡之後機務倥傯未嘗一日廢書不觀臨終留
詩有寄謝東門千樹柳安排青眼送行人之句

時年七十一謚

闕

配享宣宗廟庭至今士論謂

公才量渾厚足為守成之良相恨所遭不時耳
雨後

時雨雨三日田家家萬金有年天子慶憂國老臣心

胥莘公鼎一首

鼎字和之代州繁峙人父持國大定中為太子
司藏有功母后家章宗即位擢拜尚書右丞和
之大定二十八年進士至寧初都城受兵由戶
部尚書叅知政事宣宗即位除泰定軍節度使
不赴改判大興貞祐二年拜尚書右丞車駕南
渡出為汾陽軍節度使移知平陽權河東南路
宣撫使四年授樞密副使權右丞兼職如故五

年正月朝京師進平章政事封莘國公行臺關
中未幾兼左副元帥明年以溫國公致政封英
行臺衛州以病薨於位雷希顏為作神道碑云
黃霸為良吏稱首及為丞相與張敞論列功名
大減王允當漢祀之衰計誅董卓近古社稷臣
然不赦涼州人旋致僉汜之禍蕭俛之清介崔
植之論議皆足為唐名臣而俛議銷兵植餓朱
克融輩不畀一官遂再亂河朔彼或量不足或

才畧有所窮權不足以濟事知不足以知時故
也以姚崇之賢惟其不知道未免為掾時之相
其他可知也國家有通明相曰英國胥公尚兼
數公之長子謂希顏此論似涉過差至於為國
朝名相以度量雄天下則在公為無媿矣在長
安日乞致仕表云興造功業方聖主有為之時
表裏山河豈愚臣養病之地送弟有之云世事
正須高著眼宦途休厭少低頭他文類此弟恒

常之子嗣祖今在燕中

送弟恒作州

男子四方志人生五馬榮君恩何以報民政不宜輕御
物當存恕存心要盡誠勿矜新號令姑守舊章程歛暴
單貧困囚淹狡偽萌慈柔難禁暴苛急必傷生東郡吾
將老西陲敵未平一生能幾別四事果難并方此對床
樂愴然分袂驚荒詩何足記聊寫弟兄情

張左丞行中一首

行中字信甫莒州日照人祖莘鎮西軍節度副

使父暉御史大夫以武安軍節度致仕兄行簡

易無體勝第一人信甫大定二十八年進士衛

紹王朝虎賊已除名為民賂遺權貴得復用信

甫言其必反及弑逆自為太師尚書令澤王信

甫時為禮部尚書人謂必為所殺甚危之一日

虎下禮部鑄監國寶信甫持不可虎雖怒然亦

竟不能殺也宣宗即位授叅知政事丞相高琪

專權用事聲勢焰焰人莫敢仰視議論之際唯
信甫與之抗朝廷稱焉所居拙軒有為作銘者
其引云發凶豎未形之謀則先識者以為明犯
強臣不測之威則疾惡者以為剛蓋實錄云元
光末出為靜難軍節度使哀宗即位首命名之
遷尚書左丞後二年致政卒於松山之崇福宮
信甫家世儒素雖位宰相而奉養如寒士日書
經史五百字為課寒暑不廢者四五十年故於

書無所不讀詩殊有古意也

右丞文獻公所畫張果像

古來人物畫為難驚見仙公樹石間莫把丹青名右相
太平勲業在人寰

楊戶部慥二首

慥字叔玉代州五臺人承安五年進士歷州縣
入為尚書省令史拜監察御史侍御史京西大
農司丞京南司農卿戶部侍郎權尚書自入戶



曹卽有相望資雅重事無巨細處之皆有法至
於知朝廷大體則又非他人所能及也京城受
兵權叅知政事明年卒於河平叔王文工於詩
而人不以能文稱特未見其文耳

過司竹監有懷王監正之

不見崧丘跨鶴仙才名留得萬人傳春郊漬酒傷今日
夜雨論文記昔年宰樹謾懸公子劍高山已絕伯牙絃
故居脩竹青青在寂莫終南落照邊

乾陵

牝雞一啄血波流天下何緣不姓周今日阿婆心力盡
乾陵秃似老僧頭

狀元

鄭內翰子聃一首

子聃字景純大定人少日有賦聲時輩莫與為
敵天德三年第三人登科士論仍以為屈而海
陵不之許也正隆二年詔景純再試擇能賦者

八人先以題付之以困景純且將視其中與否

罪賞之

御題天賜勇智正萬邦海陵謂侍臣漢高祖諱不避之可乎乃改作萬國

及

開卷景純果第一人楊伯仁張汝霖中選劉幾

綦戩李師顏輩皆被黜海陵終不以景純為工

與被黜者兩罷之趙獻之賀啟云丹桂一枝不

失舊物青錢萬選無媿古人其為名流所稱道

如此累官吏部侍郎改侍講學士卒其賦醪醑

有玉斧無人解脩月珠裙有意欲留仙之句甚

為詩家所稱

即事

一錢不直程衛尉
五斗解醒劉伯倫
讀罷離騷解衣卧
門前花柳自爭春

孟內翰宗獻

六首

宗獻字友之開封人大定三年鄉府省御四試
皆第一供奉翰林曹王府文學兼記室叅軍以
疾尋醫久之授同知單州軍州事丁母憂哀毀

致卒劉無黨題其詩卷後云簪紱忘情累山林

閱歲陰遜官堂印手說法老婆心

友之深於內典

世路

嗟前却人生變古今公乎真不死名姓斗之南

相人孔嗣訓挽云二十年間事才名一夢新衰

羸驚喪母哀毀竟亡身竟返愁楓夜情留淚草

春黃公酒壚在此去只悲辛汴人高公振特夫

云見說平生夢前途盡目前

友之未第時夢中預見前途所至於

今皆 乘除雖有數凶禍竟何緣禮樂三千字才

驗

名二十年仁人遽如許無路問蒼天又云誰謂

詩成讖清冰自焚

友之雪燭詩固知劫火終無盡誰謂清冰也自焚未

幾下人嗟埋玉樹天為落文星

友之隣舍李生言六月中連二

明星隕於友之所居虛靜軒前數詩雖不盡工姑并記之有以

見先生於出處之際死生之變造物者皆使之
前知其以天下重名畀之者為不偶然云

龔平甫森玉軒

古人借宅亦種竹大是饕竒心未足高齋聞有萬琅玕

坐對懷山飲秋綠官閒勝日無一事尊酒不空仍有肉
他時剝啄叩君門高枕矮床容我宿

舊蓄一琴棄置者久矣李君仲通為張絃料理仍
鼓數曲以詩贈之

我家箏奴憂樂同塵埃滿面鬢髮蓬徽絃不具挂牆壁
似慙無以娛衰翁夫君一見為披拂坐使寒谷回春融
中含太古意味足雜以新態來無窮繁聲流水不可喻
直與造化相冥通形神久已坐灰槁一旦扶別驅盲聾

寂然反聽杳難詰但覺萬竅俱玲瓏千金不得和扁力
誰謂起廢由枯桐曲終玄旨竟誰會非絃非指仍非空
拂衣欲往君且止為我乘興彈悲風

張仲山枝巢

達人孤高與世疎百年直寄猶須臾歸來掩關聊自如
人之不足等有餘樂哉下視濠梁魚逍遙自契蒙莊書
異時馭氣游太虛我知枝巢亦蘧廬

柳塘

搖搖風影漾寒塘靜裏亭臺日月長不似隋家堤岸上
亂鴉殘照管興亡

蘇門花塢

繞舍雲山慰眼新看花差後洛陽塵從君小築繁香塢
不負長腰玉粒春

閏月九日

南崖烘暖貯秋光勝處相公醕一觴俚諺難逢兩寒食
閏餘今值小重陽頭風比似常年愈菊面渾如去歲黃

老矣歡遊定能幾佳時此樂最難忘

趙內翰攄一首

攄字子充宛平人自號醉全道人

早赴北宮

蒼龍雙闕鬱層雲湖水鱗鱗柳色新絕似江行看清曉
不知身是赴朝人

趙文學承元一首

承元字善長先世汴人兵火間寓旅河間遂占

籍焉大定十三年詞賦第一人除應奉翰林學士兼曹王府文學以疎俊少檢得罪王府貶廢久之遇赦量叙卒於臨洮

探春

冰底流泉匹練飛
麴塵著柳不禁吹
杖藜恰到春生處
已有人家插酒旗

張太保行簡

三首

行簡字敬甫大定十九年詞賦第一人家世儒

臣備於禮文之學典貢舉三十年門生徧天下

南渡後遷禮部尚書太子太保翰林學士承旨
薨謚文正楊內翰之美銘其墓稱敬甫天性孝
友太夫人疾不解衣者數月居喪哀毀過禮事
其父御史大夫自幼至終未嘗少違顏色與諸
弟居三十餘年家門肅睦人無間言率勵子弟
不知為驕侈雖處富貴與素士無異平生無汎
交無私謁慎勤周密動循禮法居無怠容口無

俚言身無徑行雖古君子無以加故天下言家
法者唯張氏為第一言禮樂言文章言德行之
純備者亦唯張氏之歸有集三十卷傳於家敬
甫賦燕云王氏烏衣巷盧家白玉堂寒食云錫
粥雞毬留故事風花鶯柳開春城中秋云露凝
灑氣霑瑤席雲近清光護桂宮此類甚多也

六月二十九日北宮朝回

疎柳衰荷又一時清波飛葉夢靈芝年年踏盡溪邊路

不覺吳霜點鬢絲

酬郭光秀才

疇昔君來事已睽
豈知今我又羈栖
波臣儻不辭升斗
鵠卵終當遇魯雞

題子端雪谿小隱圖

出處皆天豈自由
仙標終合冠黿頭
不妨貌取黃華景
時向鈴齋作卧游

張內翰檝四首

檄字巨濟先世泰州長春人有官於山陰者遂

占籍焉曾祖頤宗銀青榮祿大夫祖惠懷遠大

將軍父天白號縣簿巨濟明昌五年詞賦第一

人仕至鎮戍州刺史為人有蘊藉善談論文賦

詩筆截然有律度時人甚愛重之陝州詩云駭

浪奔生馬荒山卧病駝永寧劉氏園亭云菊老

芙蓉衰梨柿葉爭絳叩門人不應一犬吠深巷

此類甚多

秋興

飄零千里道牢落半生愁殘月如新月今秋似去秋露
濃花氣重風細竹聲幽何日清溪上煙蓑一釣舟

客中

絳脣花不語青眼柳初眠塵去尋芳馬香來載酒船歸
期仍雁後野興已鷗邊惆悵無家客春風又一年

蓮實

水妃擎出紺珠囊玉筍彫槃喜乍嘗膚白已攪新藕嫩

心清猶帶小荷香
鬪餘翠鳥零珍羽
飛盡黃蜂露蜜房
口腹累人良可笑
此身便欲老江鄉

初夏

小園綠笋間朱櫻
點綴年華似有情
露浥葛中晨氣潤
風隨竹簟晚涼生
閒窺黠鼠潛身處
靜厭飛蚊遶鬢聲
安得冷泉幽石畔
解衣盤礴樹陰清

閻治中長言八首

長言字子秀
濟南長清人
客居兗州之滋陽祖

俊行臺南榜父時昇任忠傑榜曾高以來登科者六世矣子秀少日慕張忠定之為人故名詠避衛紹王諱改焉幼孤養於從祖能自振厲好學工詞賦間有前人句法性本豪俊使酒任氣及游京師乃更折節遂以謹厚見稱酒酣耳熱故態稍出嘗以第一流自負屏山獨深知之不以為過也平生多奇夢果魁天下士論厭服在翰苑十年出為河南府治中被召以道梗不得

前卒於亳州子魯瞻魯安今一孫在洺州

北齊行

天保大人襲世貴未待齊成已無魏讖裏方傳近水羊
夢中先兆攻城蝟六君三世都能幾二十八年翻手裏
細思孝靜靈運詩天道好還非妄矣

應制中秋

璧月當秋夜未闌漢宮高會浹宸歡塊蘇塵世三千界
珠翠瑤光十二欄桂實飄香浮壽斝露華零潤溢仙槃

都人側聽雲韶奏共指天家是廣寒

婆速道中書事

此地先經戰人生苦未聊泉源疏地脉田壠上山晉敗
石平危徑枯柴補短橋曉烟明遠爨莫雪暗歸樵履滑
心頻悸梯危骨欲消解鞍空倒卧無夢訖通宵

送麗酒麗橙與秀實御史

驄馬朝回畫閣深遙知春意領梅心麗橙嬌軟麗尊小
聊助風流對淺斟

閻立本職貢圖

諤諤昌周此一書形容癸貢寫成圖寧知右相無深意
莫指丹青便厚誣

盤山招隱圖

畫出中盤望隱歸鳴珂朝馬尚遲遲賦詩未敢輕相誚
却恐吾山也勒移

三門集津圖

津門未為天下險勿作駭相觀茲圖偃月堂中李林甫

有人能寫此心無

丁氏思祖亭

鶴野三千里鳧函五百年人間仍舊德龜筮得新阡族
屬東州望衣冠鼻祖傳異時誰式墓應識子孫賢

李治中著 一首

著字彥明真定人高才博學詩文得前人體工
於字畫頗尚玄言承安二年經義第一人在翰
林七年出副定州召為戶部員外郎坐大中黨

事謫臨洮府判官量移西京路按察司判官遷
彰德府治中城再陷避于塙上兵人招降大罵
不從掘塙倒而死

觀音院書閣

明巷蓬蒿一尺深小軒岑寂似山林鳥聲落枕有高下
山色閱人無古今客裏三年侵老境床頭一易浣塵襟
晚涼癡坐忘言裏滿地西風白玉簪

異人

擬相先生王中立 六首

中立字湯臣岢嵐人博學強記問無不知少日
治易有聲場屋間家豪于財賓客日滿門所以
待之者備極豐腆其自奉則日食淡湯餅一杯
而已年四十喪妻遂不更娶亦不就舉選齋居
一室枯淡如衲僧如是三四年乃出時人覺其
談吐高濶詩筆字畫皆超絕若有物附之者問
之不言也間聞趙公知平定先生往謁之與之

詩云寄語閒閒傲浪仙枉將詩酒污天全黃塵
遮斷來時路不到蓬萊五百年因言唐世士大
夫五百人皆仙人謫降中有為世味所著迷而
不反者如公與我皆是也一日來都下館於閒
閒公家中秋夜飲酒賦詩且就公索墨水一槃
公如言與之明旦不告而去壁間留龜鶴二字
廣長一丈而墨水具在不知以何物書之也朝
士來觀者車馬填咽都下競傳王先生仙去矣

久之先生從外至問二字以何物書之不答題
詩其旁云天地之間一古儒醒來不記醉中書
旁人錯比神仙字只恐神仙字不如先生平生
詩甚多有醉袖舞嫌天地窄詩情狂墜海山平
之句他亦稱此人有問世外事者亦一二言之
好作擘窠大字往往瞑目為之筆意縱放勢若
飛動閒閒公甚愛之屏山嘗見先生商畧前代
人物引先儒論議數十條在目前如人人自相

詰難然後以己意斷之以為辨博中第一流人也臨終預尅死期如言而逝州將石倫葬之忻州時年五十六予嘗從先生學問作詩究竟當如何先生舉秦少游春雨詩云有情芍藥含春淚無力薔薇卧晚枝此詩非不工若以退之芭蕉葉大梔子肥之句校之則春雨為婦人語矣破却工夫何至學婦人先生晚年易名雲鶴自

號擬栩云

中秋

素丸東溟來飛上玻璃盆聊揮五輪手撥去萬里陰印
透山河影照開天地心人世有昏曉我未嘗古今

屏山所傳

作素紈青溟來
聊舒五輪指

雜詩四首

華山宮殿白雲封不見當年打睡翁貪看終南山色好
不知紅日下前峯

又

獨跨蒼虬下太清
春風萬里月華明
因君感激為君說
鑿破天機我也驚

又

雲葉粼粼皴碧空
笙簫遞響入天風
忽驚風浪耳邊急
不覺形神來世中

又

此生休更問浮名
名利區區不暫停
我有一丸天上藥
用時還解濟蒼生

題裕之樂府後

常恨小山無後身
元郎樂府更清新
紅裙婢子那能曉
送與凌煙閣上人

王先生予可

七首

予可字南雲吉州人父本軍校南雲亦嘗隸籍
年三十許大病後忽發狂久之能把筆作詩文
及說世外恍惚事南渡後居上蔡遂平郟城之
間在郟城為最久過文士則稱大成將軍於佛

前則諦摩龍什於道則騶天玄俊於貴游則威
錦堂主人為人軀幹雄偉貌亦竒古戴青葛巾
項後垂雙帶狀若牛耳一金鏤環在頂額之間
兩頰以青涅之指為翠靨衣長不能掩脛故時
人有哨腿王之目落魄嗜酒每入城市人爭以
酒食遺之夜宿土室中夏月或尸穢在旁蛆蟲
狼藉不卹也人與之紙落紙數百言或詩或文
散漫碎雜無句讀無首尾多六經中語及韻學

家古文奇字字或峭勁遇宋諱亦時避之人或
問以故事其應如響諸所引書皆世所未見談
說之際稍若有條貫則又以誕幻語亂之麻知
幾張伯玉與之游最狎說其所作以百分為率
可曉者才二三耳題崧山石淙云石裂雲華漬
月秋蓋石淙之石皆狀若湖玉其高有五六十
尺者石之文如蟲蝕木如太古篆籀奇峭秀潤
一一在潭水中親到其處知詩為工也蔡州北

懸壺觀仙榆云壺樹苔波月清皺醉後云一壺

天地醒眠小宮體云萬疊雲山飛小雁射虎首

句云風色偃貂裘即閣筆自戲云此虎來矣樂

府云唾尖絨舌淡紅甜又自戲云欲下犁舌獄

耶和太伯宮詞云金盆水不暖翠雀啄晴苔又

云鳳蹴瑤華散龍銜桂子香西瓜云一片冷截

潭底月六彎斜卷隴頭雲烹茶云簾捲綠陰花

外月玉山水雪醉扶翁凌霄花云啼鳥倒銜金

羽舞驚蛇斜傍玉簾飛威錦堂樂府云鳳環捧

席帶香屏鯨杯倚伎和雲捲

屏疑作憑

此類尚多人

亦多贈南雲詩者李子遷云石鼎夜聯詩筆健
布囊春醉酒錢麓真南雲傳神詩也壬辰兵亂
為順天軍將領所得知其名竊議欲挈之北歸
館於州之瑞雲觀南雲明日見將領自言云我
不能往君家瑞雲觀也不數日病卒後復有見
之淮上者

宮詞

水曲朱門漪漾漫
一簾花雨月波寒
金閨背襯鴛鴦冷
春困秋千立畫干

南園湖石

翠雀銜雲墮翠蕪
砥峯倒影卧平湖
飛花不到穿簾月
高倚晴天一劍孤

馴鶴圖

張伯玉家畫幀宮人徐行以手整釵一鶴後隨謂之馴鶴圖伯玉請賦詩欽叔常苦

其作詩多不用韻
限以釵來苔三字

寢處粧鉛未捲釵孤雲花帶月邊來六宮簾幕金鸞冷
露濕晨煙啄翠苔

雜詩二首

白露沙灘浸綠湄小舟艤岸尚依稀山回屏曲江連樹
春鎖人家深處歸

又

暗悲秋色素團團一雨飄零颺霽寒天淨長空烟斂處
彩虹金挂樹頭山

宮體二首

紅葉鋪霜撼御階
繡蓮塵蹴襯羅鞋
袖沾鴛翅調簧語
墮却銜翹入鬢釵

又

驕馬金籠藉草歸
翠鸞屏曲染紅霏
凭欄山色春風裏
喚得鶯兒燕子飛

照了居士王彧

四首

彧字子文洺州人承安中進士資剛決不可犯

為尚書省掾知管差除與郎官相可否即棄官

去往來登封盧氏山中改名知非字無咎自號

照了居士居山中二十年布衣蔬食井臼自親

時人哀苦之而知非處之自若也少日為文工

於四六詩亦有功和二宋落花韻四首云曾見

嬌窺宋玉牆忽驚遺夢到延涼聚塵非分侵凌

玉流水無情葬送香錦鞮謾拋終隔面綵灰雖

吐若為腸蒼苔碧草無窮恨木石癡兒亦自傷

可人未厭出鄰牆回首空殘翠幕涼好事只傳
懷夢草殊鄉誰致返魂香塵凝燕子慵開眼煙
暗馬嵬空斷腸穠李絳桃俱異物為歌薤露寫
餘傷綠影浮空只自傷賞心死著未能忘瓊枝
不解留春色銀燭空存照夜妝肺腑已傳蜂蜜
盡肌膏仍與燕泥香情知青帝回車日合有翹
風老退房絲華終竟合凋傷獻笑縈懷忍遽忘
露壓不禁昏淚臉風披無奈醉愁妝芳菲頓減

園林趣狼籍空餘陌路香却憶班姬浪辛苦一
生都得幾專房既學佛作決定歌禪家以為證
道新豐之後無有及者初出京有詩云親疎俱
穩人倫了婚嫁齊成俗意周一筆盡鉤塵債斷
都無虧欠大家休休休休愛著何時是徹頭風
息浪平人已渡笑攜明月下孤舟崧山中云撒
手寧論萬丈崖脚跟未肯點塵埃東君也自魔
君數故著青紅眼底來來何遲去何早二五不

多十不少一聲柄木徧虛空誰識堂堂真照了

又贈安居士國寶云不招措大嗔不喚王子文
不惹禪和笑不名王照了他人怕人嫌照了要
人嫌人人有面樹有皮努力方便勤粧嚴粧嚴
也由賢不然也由賢鼻孔莫遣他人穿又答國
寶云幻人誰拙復誰能遊戲何妨傀儡棚凡事
不堪君莫怪儂家面目得人憎又云忽然識破
虛空我六合縱橫更有誰正大壬辰參知政事

宗室思烈行臺洛陽以知非有重名力致之使
參議臺事城陷不知所終子升卿有賦聲早卒
禪頌三首

昧已全拋大事憂為渠剛攬等閒愁桑榆晚景無多子
針芥人身豈易投

又

閒日構來忙日用此生迷却再生休鼻頭捩轉從今始
看作回程火裏牛

又

吾身非我底為情說著塵勞特地驚
五九盡時山更好
澗泉雲鳥自春聲

又頌

放下情懷觸處安
生涯取取沒多般
褐衣襤褸聊遮赤
短髮鬪髻底用冠一榻
省緣資困歇二匙隨
分了飢食也知苦
澀人人笑烈日初心
不敢謾

貞祐末行臺都尉南征獲武經進士

李申之于盱眙左右司郎中劉光講達卿潤文官李獻能欽叔愛其才辨欲活之以避嫌不敢也乃託以問事

機令軍中羈管之申之作詩贈主囚者云一飯感君無地報寸心許國只天知明早定作長淮鬼馬革仍煩為裹尸又云胷中萬古橫鍾阜一死鴻毛斷不移又獻書都尉云金國歲歲南侵計所得不能一二州而軍力折耗殆盡今歲此舉亦曾慮人有議其後何以禦之乎為公計者不若此南軍大舉斂兵而退雖屢出無功得全師而返猶可自救不然師老食殫困頓于堅城之下讒間一行則公受禍不久矣某軍敗而死固其所也乞于盱眙城下責以不降之罪以一死見處使人人知之則都尉亦于名教有功書上之明日申之謀遁歸不果乃殺之欽叔說其臨刑回面南向欣然就戮甚嗟惜之予謂申之胷中萬古橫鍾阜與王知非烈日初心不敢謾皆烈丈夫語故附見于此

無事道人董文甫 八首

文甫字國華潞人承安中進士為人淳質恬于世味於心學有所得人知尊敬之而不知其所以得也子安仁亦學道父子嘗閒居實豐閉戶不出以習靜為業朝夕不繼晏如也國華歷金昌府判官禮部員外郎昌武軍節度副使正大中以公事至杞縣自知死期作書與家人及同官又作詩貽杞縣令佐詩畢擲筆于地以扇障面而逝有和太白山明和尚牧牛圖詩刻石於

洛陽其引云夫人有等差教分頓漸上根之人
一聞千悟不落階級中智而下必由漸進此人
牛次第不得不立心性動靜微妙有無學者所
宜諦觀也以人牧牛是動而有制從有以觀其
徼者也進進而不已則漸至於回首馴服從無
以觀其妙者也有入于無徼及于妙固善矣又
不知靜而無礙之為愈也靜而無礙又不知兩
忘雙泯之入神也若夫人牛兩忘明月獨照恍

然俱失所在當是時也吾將離形去智神亦無
功同于大通與道為一則向之人牛亦筌蹄中
一微塵耳吾儒所謂盡心盡性者無外於是因
借明和尚韻再下一轉語會心者必能知之詩
不錄

秋夜

見即如無爐上雪淡而有味水中鹽齊行定慧千燈焰
淨識乾坤一鏡奩

晝眠

莊周先我復天真
化蝶飛來管領春
我亦莊周周亦蝶
不知若箇是真身

審是堂

按劍人人駭夜光
蜀雞合道勝鸞凰
飛蛾可是無分別
直道油燈是太陽

文中子續經

紛紛迷作史才雄
聽似秋來百草蟲
不是春雷轟蟄窟

蚓蛇會得化成龍

予嘗以王氏六經為問先生云王氏六經以權道設教雖孔子亦然但後

人不能知之耳因以此詩見示

臨終詩四首

無情喪主沒錢僧送上城南無事人
檢盡傳燈無盡錄
更無公案遮番新

又

生有地死有處萬牛不能移一步
一輪明月印天心此
是渠儂住處住

又

白髮三千丈紅塵六十年只今無見在虛費草鞋錢

又

今古一輪月分明印碧霄門門蟾影到處處桂香飄不起眼中暈何勞指上標真空渾照破歸去杖頭挑

隱德

薛繼先四首

繼先字曼卿猗氏人少日三赴廷試南渡後隱

居洛西山中課童子學事母孝與人交謙遜和雅所居人化之子純孝字方叔有父風客有詐為曼卿書就方叔取物者曼卿年已老狀貌如少壯人客不知其為曼卿而以為方叔也而與之書曼卿如書所取物付之雖其家人亦不以與知也監察御史石玠子堅行部過曼卿曼卿避不之見或言君何無鄉曲情耶曼卿曰君未之思耳凡今時政未必皆善石御史一有所劾

則必謂自我發之同惡相庇他日并鄉里有受
禍者其畏慎類此正大末司農卿楊慥叔玉丞
康錫伯祿薦曼卿與汴人高仲振武陟宋可武
清張潛磁陽曹珏大名王汝梅隱操不減古人
朝廷議授以官以兵亂不果曼卿喜作詩工于
賦物如松化石云瘦見千年傲霜骨鍊成一片
補天心時人稱焉壬辰之亂病没于宜陽仲振
字正之系出遼東其兄領開封鎮兵正之幼就



舉選年四十後即以家業付其兄挈妻子居嵩
山於書無不讀而以易皇極書為業安貧樂道
不入城市山野小人亦知敬之王汝梅張潛從
之學三人行山谷間人望正之風袖翩然如欲
仙而未舉也張王說正之嘗遇異人教之養生
呼吸吐納日以為常靈氣時至安坐不動而骨
節戛戛有聲恍惚中時與真靈接對所談皆世
外事既不以語人故無得而傳潛字仲升有志

節慕荆軻聶政之為人三十歲乃折節讀書太
學諸人高其行義有張古人之目客嵩山從正
之學易五十歲始娶妻妻魯山孫氏亦有賢行
夫婦相敬如賓負薪拾穗行歌自得大用與之
同業而生理優贍怜高張之貧時有餽餉皆謝
不受鄉里為仲升劖瓜田瓜熟仲升約中分之
以償其勤衆不忍但小摘而去仲升亦棄瓜不
收衆如約然後取食之嘗行道中拾得一斧夫

婦計度移時乃持歸就訪其主歸之所居寺庄

有兄弟分財致諍者其弟指仲升所居曰我家

如此獨不畏張先生笑人耶天興之兵避於少

室絕頂時世已亂寇斂暴橫無復人理仲升不

甘與之處閉口不食七日而死婦隨亦投絕澗

中汝梅字大用律學出身伊陽簿秩滿遂不出

性嗜讀書動有禮法生徒以法理就學者兼以

經學授之後生輩服其教無敢為非義者可字

予之貞祐之兵其姑嫁大姓豪氏夫與子皆兵
死而貲產獨在姑以白金五十笏遺予之子之
受不辭一日姑得豪之疎屬立為後挈之省外
家予之置酒會鄉鄰且謂姑言姑往時遺可以
金可以豪氏無子故受之姑今有子矣此金豪
氏物非姑物也我何名取之因呼妻子昇金出
歸之豪氏鄉里用是重之大兵再駐山陽軍中
有聞予之之名者問知所在質其子使人招之

曰肯從我者禍福與君共之不然公之子死矣
親舊競勸之往予之不從曰吾有子無子與吾
兒之死與生皆有命焉豈以一子故併平生所
守者而亡之乎其後予之竟以無子死珏字子
玉早歲有賦聲誠實樂易世俗機械事皆所不
知喜賓客欵於接物無書生氣習從之游者樂
之而不厭也六人者喪亂後惟子玉居弘州十
二年乃終

九日感懷

曼卿

衰年易感我今知無訝騷人動楚悲故國久拋兵劫後
佳辰多負菊花期一時蘭艾同凋落兩鬢雪霜仍別離
高世輸他陶靖節悠然高興滿東籬

過洛陽

予之

西來東去洛陽城千尺浮圖了送迎十日酒旗歌板地
白頭孤客可憐生

寄人宰縣

仲升

縣務無難易人才自異同割雞良暫屈製錦要專工積
弊姦賊後遺黎喘汗中不存憂世志底用讀書功嫉惡
看平日知君有古風莫教循吏傳獨載魯山翁


戴方言作
上聲呼

白髮感懷

子玉

豪舉氣如虹今日蕭然一病翁曉鏡祇添頭上雪
春風不綠鬢邊蓬文章那作一錢直燈火空勞半世功
擬築糟丘便歸老醉鄉何者是窮通

中州集卷九



總校官庶吉士臣侍朝

校對官庶吉士臣陳墉

謄錄貢生臣張健